

Кондак 1

Избранный от всех родов Помощнице рода христианского, к богоугодней жизни раждающей, благодарственная пения приносим Ти, Богородице, о даровании чудных иконы Твоей. Ты же, яко скорая и всемилостивая верных Заступница, не остави нас в скорбях, да зовем Ти:

Радуйся, Помощнице в родах, чад Своих к Царю Славы приводящая.

Икос 1

Ангел предстатель послан бысть рещи Богородице:
«Радуйся!» егда Бог Слово воплощающееся во утробе Ея; и мы, грешники, дивящиеся святому Рождеству, пред иконою чудною Твоей с верою и надеждою вопием Ти:

Радуйся, радость Христова Рождества познавшая;
Радуйся, Сына Света нам даровавшая.
Радуйся, скорби гонений с плодом во чреве претерпевшая;
Радуйся, в подвигах матерних на земли преуспевшая.
Радуйся, скорби родов в радость претворяющая;
Радуйся, Твою любовию нас для неба созидающая.
Радуйся, подвигом жития Твоего нас просветившая;
Радуйся, чудными роды весь мир удивившая.
Радуйся, Помощнице в родах, чад Своих к Царю Славы приводящая.

Кондак 2

Видящи, Всенепорочная, во славе Сына Твоего пред нами пребывающая, скорби верных рабов Твоих, яже гневного ради Божия вразумления посылаемая, благоволила еси явити икону Твою, чудесы ю прославляющи, да покрываемии Твою любовию с надеждою вопием Богу: Аллилуиа.

Икос 2

Жизнодателя рождающая, Пресвятая Богородице, благодатное попечение женам в родах утвердила еси, разуму нашему просвещение свыше исходатайствовала еси, да познаем, что есть воля Божия благая, угодная и совершенная. Мы же, дивящиеся свыше благодатному укреплению со слезами радости вопием Ти:

Радуйся, от грехов нас отвращающая;
Радуйся, трудную долю жен облегчающая.
Радуйся, сердца наша любовию Твою умягчающая;
Радуйся, молитвами Твоими Сына нам в помощь призывающая.
Радуйся, Рождество Сына Твоего никогдаже забывающая;
Радуйся, в родах жен христианских не оставляющая.
Радуйся, в духовном рождении всех благословляющая;
Радуйся, в свет Сына Твоего неизменно призывающая.
Радуйся, Помощнице в родах, чад Своих к Царю Славы приводящая.

Кондак 3

Сила Вышняго благодатию Богоматере землю Русскую освящает, чад духовных Своих измлада любовию умудряющи и воинов Христовых к чистоте Православия непрестанно призывающи; мы же с верою прибегаем ко Господу, пред иконою Твоей,

Богородице, волиши Ему: Аллилуия.

Икос 3

Имамы Тя, Заступнице усердная рода христианского, яко Мать, чад Своих покаянию и смирению научивающую, токи чудес нам во укрепление от пречестныя иконы Своей милостиво источающую, благодатию от Бога во спасение всех нас осеняющую. Сего ради зовем Ти сице:

Радуйся, явлением иконы Твоей мглу лютых обстояний отгоняющая;

Радуйся, во святей Руси верных чад православною верою окрывающая.

Радуйся, боли при родах благодатию Святаго Духа ослабляющая;

Радуйся, любве Твою всегда нам источающая.

Радуйся, в скорбех многим женам прозрение;

Радуйся, дарующая любящим Сына Твоего молитвенное попечение.

Радуйся, сердца наша радостию родов умягчающая;

Радуйся, в святость и чистоту детства нас возвращающая.

Радуйся, Помощнице в родах, чад Своих к Царю Славы приводящая.

Кондак 4

Бурю лютых смятений во стране нашей воздвигнутых врагами Церкви, Пресвятая Дево, укрощающи, чад Твоих заблуждших в покаянии умудряющи, души жен воинов Христовых в родах надеждою светлою укрепляющи, научающи тем люди Твоя благодарственно пети Богу: Аллилуия.

Икос 4

Слышавше православии людие сокровенную тайну, яко предстательством Твоим, Богородице, суд о Отечестве нашем преложен на милость, и дивящеся свыше благодатному Твоему попечению, благоговейно волиши Ти сице:

Радуйся, наша семья от уныния избавляющая;

Радуйся, благодатным Твоим покровом младенцы осеняющая.

Радуйся, скорби ради покрытия грехов нам попускающая;

Радуйся, чад наших в святости охраняющая.

Радуйся, юность нашу светом истины просвещающая;

Радуйся, супружества венчанная пред Богом с любовию хранящая.

Радуйся, к Таинству венчания супруги призывающая;

Радуйся, от блуда смертного всех верных предостерегающая.

Радуйся, Помощнице в родах, чад Своих к Царю Славы приводящая.

Кондак 5

Боготечная звезда явися нам, Богородице, честная Твоя икона, всех скорбящих в родах жен лучами чудес Твоих осиявающая, блуждающих в духовнем мраце к свету Сына Твоего призывающая, в греховных страстех утопающих в благодатный мир милостию Бога Отца облекающая и на путь спасения утешением Святаго Духа наставляющая. Мы же, верою обретше радости сия,

вопием к Богу: Аллилуйя.

Икос 5

Слышавше православии людие, яко святую икону Твою, Богородице, Господь многими чудесы прославляет: скорби жен христианстих в родах облегчает, сердца отец и матерей во славу Божию радостию наполняет,— яко освящение, яко щит и вспоможение почитают ю. Сего ради вопием Ти сице:

Радуйся, жилище и доме Христа Бога нашего;

Радуйся, спасение русского народа, в отчуждение от Бога духом впавшаго.

Радуйся, христиан непобедимая Хранительнице;

Радуйся, наших грехов пред Богом Искупительнице.

Радуйся, благодатней надеждой сердца жен в родах наполняющая;

Радуйся, к духовному рождению в Таинстве Крещения неустанно призывающая.

Радуйся, добродетелей великое стяжение;

Радуйся, Божие к немощним благоволение.

Радуйся, Помощнице в родах, чад Своих к Царю Славы приводящая.

Кондак 6

Пред пречистым Твоим образом проповедаем, Госпоже Богородице, великия Твоей милости, яко семьи христиан ограждаеши, церкви домашния благодатию Святаго Духа покрываеши, жен со чады защищаеши, и, ведуще Тя воистину Помощницу непобедиму, приносим Ти славословия сия и радостно вопием Богу: Аллилуйя.

Икос 6

Воссиявши просвещение истинное, Пречистая Богородице, явися чудная икона Твоя, родителем на утешение, рассеянным семьям в воссоединение, востающим на Господа неверием в предупреждение, всем нам во укрепление и вечное блаженство во Христе, Господом дарованное искуплением. Мы же, дивящиеся о нас попечению, благодарно вопием Ти:

Радуйся, от внезапных смерти нас избавляющая;

Радуйся, мрачных духов святостию Твою отгоняющая.

Радуйся, наша отступления от Бога любовию Твою покрывающая;

Радуйся, истинно нас молитися научаящая.

Радуйся, к долготерпению в скорбех и недузех нас приклоняющая;

Радуйся, богоносней руце Твои за нас, грешных, к Сыну в молитве непрестанно возносящая.

Радуйся, николиже верных Сыну Твоему заступлением не оставляющая;

Радуйся, немощных благодатным Покровом Твоим покрывающая.

Радуйся, Помощнице в родах, чад Своих к Царю Славы приводящая.

Кондак 7

Хотяй всем человеком спастися и во истине просветится,

Премилосердый Господь, усынови нас Матери Своей и дарова ю женам христианстим в родах в поможение, чадом нашим в благодатное небесное окормление. Мы же, обряще от Бога радости сия, со слезами вопием Вседержителю: Аллилуя.

Икос 7

Нову показа милость всех Творец и Владыка наш Господь, егда положи во гневе Своем за грех наказати род человеческий и рече жене Адама: В болезнях родиши чада твоя, — яко сотвори сие для многих человеков ко вразумению спасения ради душ их. Сего ради и мы, Владычице, припадающе к пречистому образу Твоему, усердно молим Тя: милосердия двери отверзи нам, вопиющим Ти сице:

Радуйся, неприступного Божества селение;
Радуйся, Ангельское и наше непрестанное удивление.
Радуйся, Божия милости и любве исполнение;
Радуйся, Подательнице спасительного в родах вспоможения.
Радуйся, правды святыя Попечительнице;
Радуйся, любве и доброты непоколебимая Хранительнице.
Радуйся, в гордости закосневших заступления Твоего
лишающая;
Радуйся, от крещеных младенцев радостный взор Твой не
отвращающая.
Радуйся, Помощнице в родах, чад Своих к Царю Славы
приводящая.

Кондак 8

Странно маловерующим слышати, како образ Твой святый токи благодати источает, грешным, в покаянии к Тебе пришедшим, радость дарит, исцелением скорбящих и болеющих жен в родах Бога прославляет, мы же с верою поклоняемся Тебе: образ бо честию к первообразу восходит, и, всемерно прославляюще Тя, с радостию поем Богу: Аллилуя.

Икос 8

Вся еси горе и земных не оставляши, Пресвятая Богородице, узы страстей благодатным попечением ослабляши, в покаянии притекающим к Тебе представительством пред Богом очищаши, искуплением Христовым сердца наша преображаши. Сего ради, величающе, воспеваем Ти тако:

Радуйся, чрез покаяние к Богу приводящая;
Радуйся, покаянием нашим двери райских отверзающая.
Радуйся, родительским покаянием от чад болезни
отвращающая;
Радуйся, покаянием мир духовный в семьях верных
утверждающая.
Радуйся, покаянием бесовских разлады в семьях угашающая;
Радуйся, покаянием церковным со Христом нас вновь
соединяющая.
Радуйся, в покаянии приходящих преображающая;
Радуйся, чрез покаяние заступлением Твоим пред Сыном
спасающая.
Радуйся, Помощнице в родах, чад Своих к Царю Славы
приводящая.

Кондак 9

Всякого естества ангельского превысшая явилася еси,
Пресвятая Дево, Бога бо зачала еси плотию, Господа во утробе
Твоей вместила еси, темже яко Святейшую и Славнейшую у
Престола Царя царей величающе Тя, вопием о Тебе Богу:
Аллилуиа.

Икос 9

Ветийства боговещанных проречений ныне зrim о Тебе
сбывающаяся, Богородице, яко воистину Бога плотию родила еси
нам. И будущаго Царствия Божия не лиши нас, Покровом Твоим нас
от козней мира сего оберегающи. Мы же обетованное блаженство
во Христе в молитвах призываем и в покаянии вопием Ти:

Радуйся, твердое православия укрепление;
Радуйся, душ наших скорое спасение.
Радуйся, отчужденных от Бога к вере возрождение;
Радуйся, духовное наше прозрение.
Радуйся, в чистоте православия нас оберегающая;
Радуйся, от греховного падения нас изводящая.
Радуйся, вопиющих к Тебе скорое услышание;
Радуйся, чадородие благословляющая.
Радуйся, Помощнице в родах, чад Своих к Царю Славы
приводящая.

Кондак 10

Спасти хотящи многая жены в родах от обдергахих их
страстей и напастей, чудную икону Твою, Богомати, даровала
еси, еяже ради козни диаволя утихают, смертоносныя болезни
исчезают, боли в родах ослабевают, да вси, видяще являемую
Тобою милость, вопиют со умилением Богу: Аллилуиа.

Икос 10

Стена еси, Богородице Дево, Святей Руси и народу ея
ограждение, врагов Православия обличение, женам-матерем
сугубое утешение, малым чадом благодатное попечение. Тем же,
благодаряще Тя, вопием Богу:

Радуйся, прославляющих Тя от бед избавляющая;
Радуйся, позабывших Тя посрамляющая.
Радуйся, православных матерей славо и попечение;
Радуйся, сохраняющих целомудрие верное ограждение.
Радуйся, спасительный елею кающихся;
Радуйся, Царице Небесная всех во Христе раждающихся.
Радуйся, радости наша умножающая;
Радуйся, младенцев и матерей сугубою любовию Твоей
защищающая.
Радуйся, Помощнице в родах, чад Своих к Царю Славы
приводящая.

Кондак 11

Пение хвалебное и благодарственное приносим Ти, Пресвятая
Владычице: под Покровом Твоим в Православней Церкви по милости
Божией раждаемся, в благодатном окормлении Твоем неизменно
умудряемся, заступлением Твоим во Христе искони спасаемся, и

возложивше на Тя упование, радостно вопием Богу: Аллилуиа.

Икос 11

Светоприемная свеща истиннаго света сущим нам на земли явльшися, души просвещаеши, чтуших Тя в вере во спасение наставляеши, младенцев во утробах матерей охраняеши, да поем Ти сице:

Радуйся, в рождении чад скорби ослабляющая;
Радуйся, грехи наша Твоими молитвами к Сыну отпускающая.
Радуйся, воином Христовым жен смиренных посылающая;
Радуйся, непорочность отроковиц охраняющая.
Радуйся, духовно всех невидимо окормляющая;
Радуйся, Твою любовию в бедах нас покрывающая.
Радуйся, от хульных мыслей предостерегающая;
Радуйся, от умерщвления неродившихся младенцев всех отвращающая.
Радуйся, Помощнице в родах, чад Своих к Царю Славы приводящая.

Кондак 12

Благодать небесныя славы Твоей дати восхотевши почитающим Тя с любовию, Владычице, по вере даруеши чрез икону Твою богообщение, знамения и чудеса исцеления, от духовных скорбей избавление. Мы же, ведевше сокровища сия, велегласно вопием к Богу: Аллилуиа.

Икос 12

Поюще Твоя чудеса, бывшая в древняя и настоящая времена, хвалим Тя, Богородице, верным врата в жизнь вечную молитвами Твоими отверзающая, благодатию Святаго Духа в земной жизни защищающая, ко Господу людей избранных Твою любовию привлекающая; мы же, упование по Бозе возлагающе на Тя, с покаянием вопием сице:

Радуйся, отчаянных спасение;
Радуйся, погибающих оживление.
Радуйся, от бед избавление;
Радуйся, духовные радости утверждение.
Радуйся, обидимых Утешительнице;
Радуйся, гонимых Покровительнице.
Радуйся, в малом верных укрепляющая;
Радуйся, возлюбивших Господа окормляющая.
Радуйся, Помощнице в родах, чад Своих к Царю Славы приводящая.

Кондак 13

О Всепетая Мати, Помощнице в родах, рождшая всех святых Святейшее Слово, надеждо духовнаго нашего пробуждения и во всем благого поспешения, в родах телесных, Благодатная, женам православным утешение, Царствия Небеснаго наследники всех сотвори, верно вопиющих Богу: Аллилуиа.

Этот кондак читается трижды, затем Икос 1-й и Кондак 1-й

Молитва ко Пресвятой Богородице

Приими, Госпоже Богородительнице, слезная моления рабов

Твоих, к Тебе притекающих. Зрим Тя на святей иконе во чреве носящую Сына Твоего и Бога нашего, Господа Иисуса Христа. Аще и безболезненно родила еси Его, обаче матерния скорби веси и немоши сынов и дщерей человеческих зриши. Темже тепле припадающе к цельбоносному образу Твоему и умиленно сей лобызающе, молим Тя, Всемилостивая Владычице: нас, грешных, осужденных в болезнях родити и в печалех питати чада наша, милостивно пощади и сострадательно заступи, младенцы же наша, такожде и родившия их, от тяжкаго недуга и горькия скорби избави; даруй им здравие и благомощие, да и питаемии от силы в силу возрастати будут, и питающая их исполнятся радостию и утешением, яко да и ныне представством Твоим из уст младенец и ссущих Господь совершил хвалу Свою.

О Мати Сына Божия! Умилосердися на матери сынов человеческих и на немощных люди Твоя: постигающая нас болезни скоро исцели, належащия на нас скорби и печали утоли и не презри слез и вздоханий рабов Твоих. Услыши нас в день скорби, пред иконою Твою припадающих, и в день радости и избавления приими благодарная хваления сердец наших. Вознеси мольбы наша ко Престолу Сына Твоего и Бога нашего, да милостив будет ко грехом и немощем нашим и пробавит милость Свою ведущим имя Его, яко да и мы, и чада наша, прославим Тя, Милосердную Заступницу и верную надежду рода нашего, во веки веков.

Молитва иная

О Пресвятая Госпоже Владычице Богородице, в земной жизни нас не оставляющая! К кому молитвы вознесу, к кому слезы и вздохания принесу, аще не к Тебе, всех верных утешение! Со страхом, верою, любовию, Мати Живота, молю: да вразумит Господь люди православныя во спасение, да даст рождати нам чад Тебе и Сыну Твоему во благоугождение, да соблюдет нас в чистоте смирения, в надежде о Христе спасения, и дарует нам всем, в покровах благодати Твоей, земное утешение. Храни нас под сению милости Твоей, Пречистая, молящимся о родах помози, наветов злых свободи, тяжких бед, напастей и смертей отврати. Даждь благодатное прозрение, дух сокрушения о грехах, даждь зрити всю высоту и чистоту дарованного нам Христова учения; храни нас от погибельного отчуждения, да вси, благодарне воспевающе величия Твоя, сподобимся небеснаго успокоения и тамо с возлюбленными Твоими, со всеми святыми прославим в Троице Единаго Бога: Отца и Сына и Святаго Духа, ныне и присно, и во веки веков. Аминь.

Тропарь Пресвятой Богородице

Тропарь, глас 4:

Мати Бога нашего, во утробе заченши Христа Жизнодавца, помоши в рождении Того не потребовала еси, темже легче разрешился рабам Твоим благослови и помози, и младенцев их во время благопотребное родитися имущих, под покров Твой, яко Матерь, молим, приими: Ты бо еси в родах Помощница, Заступница рабом Твоим.

Кондак, глас 2:

Слез Евиных разрешение, пророческих писаний исполнение,
от Духа Святаго Богомладенца заченшая, и во яслех Вифлеемских
Того смиленно родившая, к Тебе прибегаем яко Хранительнице жен
и младенцев, к Тебе вздыхаем и Тя величаем: радуйся,
Благоутробная Мати, в родах Помощница.

**Празднование в честь иконы «Помощница в родах» установлено
Украинской Православной Церковью Московского Патриархата, по
благословению Блаженнейшего Владимира, Митрополита Киевского и
всех Украины**20 сентября/3 октября.